

翼且有憑守石更圖之事今若遽以爵賞之則慮有泄事之患諭以此
意厚給銀兩而送之朝廷若未知曲折先施爵賞於舜臣狀 啓之人
則必起守石妖恚之心而賊中聞之防備益嚴則從此所圖之事恐無
所施故憑臣 啓達矣且今此密議之事則已具於元翼狀 啓之中
故不必書 啓矣○辰時四方有霧氣自一更至二更巽方有赤氣
二尺餘長十丈餘起天際指天中其光照地南方坤方有赤氣○甲午
○敦寧都正黃慎上疏臣之將 命賊中已二年之久所當灼察情偽
痛陳利害俾兇謀有所沮 廟筭有所據而臣不及此臣罪一也洎夫
跟隨之 命一下臣固知此舉之無名而徒以在我之勢有綴旒之危
苟得因此而少紓燃眉之急者乃朝家遣使之本意故臣不敢臨亂而
辭事臣之不明已著於此而及其足躡讎庭乃又見卑於賊由臣庸劣
辱及國家臣罪二也賊不效順既廢通好之禮初無片言隻字之相加
且無差人償接之常儀其間一二聞見只得於沈遊擊平調信輩和相
告報而已臣雖欲一言以爭曲直亦無其地臣之妄意賊既如此則固
不可要見亦不當致辭到此地頭但當全命而返耳苟使臣乞留求見
以竣事為期則事雖或竣而詬辱滋大賫命空返誠出於不得已而臣